

.lxi. DE PROPHETIS .

Hos sequitur electio prophetarum . cum quibus locutus est dominus . et ostendit illis secreta sua . ut ea quę uentura erant quasi presentia spiritu sancto inluminati agnoscere atque enuntiare potuerunt . principes populorum uentura predicando facti ; alii in utero . alii in pueritia ; alii in iuuentute atque illi in senectute . deo cogniti et sanctificati inuenti sunt . Fide pleni . deuotione summi ; industria solertes . excellentes ingenio ; in exercitiis disciplinae stricti . in sancta meditatione assidui . metuque mortis intrepidi . Multi quoque ex eis miraculorum signis effulsere ; hominum infirmitates curabant . mortuorum corpora resuscitabant . christi uero per uirginem natiuitatem atque passionem uel resurrectionem siue ascensionem . et aduentum futurum /132r/ in consummatione mundi iudicio dei edocti . clara uoce predixere . Hos omnes procul dubio ueneranda huius diei festiuitate nulló modo priuatos esse . credimus sed consortes fieri eam intuendo speramus . Prestante domino nostro iesu christo . qui cum patre et spiritu sancto uiuit et regnat in secula seculorum . ameN .